

Incumbensa da la fracziun da la PPS concernent il transport d'autos tras il Veraina – pass dal Flüela

Il tunnel dal Veraina e la serrada dal pass dal Flüela durant l'enviern han gia procurà differentas giadas per discussiuns. Cum-bain ch'il tunnel dal Veraina ha purtà blers avantatgs per la regiun e schebain ch'er la serrada dal pass dal Flüela durant l'enviern è bunamain incontestada en il fratemp, n'è la situaziun anc ditg betg cuntentaivla. En cas d'envierns cun blera naiv resta uschia la via dal pass dal Flüela, per mancanza d'in management da lavinias durant l'enviern, serrada bler memia ditg (l'onn 2019 fin il cumenzament da zercladur). Quai chaschuna differents dischavantatgs per la regiun: ils custs da chargiada per las interpresas e per las persunas privatas s'augmentan, la flexibilitad daventa pli pitschna (urari da stad al Veraina, ma la via dal pass è serrada) ed ils giasts da l'Engiadina ston tolerar lungas colonnas al Veraina e vegnan baud u tard a tschertgar in'otra destinaziun da vacanzas.

Er ils custs al Veraina èn vegnids adattads ils ultims onns mo vers ensi e la cumparegliaziun cun autras staziuns per trasportar autos è daventada anc pli extrema. Cun fin 44 francs per autos da persunas e cun 288 francs per autobus èn las taxas da chargiada cleramain memia autas. Quai mussa er la cumparegliaziun cun il Furca (33 francs / 225 francs), cun il Lötschberg (29.50 francs / 220 francs) e cun l'Arlberg (10 euros). Ils custs na correspundan er insumma betg a la cifra dad 11.50 francs ch'era vegnida publitgada quella giada per la votaziun davart il credit dal Veraina (uschenumnada grondezza dals custs da gestiun).

Perquai vegn la regenza incumbensada:

1. D'intervegnir tar las persunas responsablas da la Viafier retica e da la confederaziun e da pretender ina reducziun dals pretschs da chargiada giu sin l'autozza dal Furca e dal Lötschberg.
2. D'introducir ina tariffa per persunas indigenas (analogamain a las telefericas) per tut las Grischunas e tut ils Grischuns.
3. Da sustegnair meglier l'uniun Pro Flüela durant envierns cun blera naiv (siglientar lavinias, rumir la naiv e.u.v.), uschia ch'igl è pussaivel d'avrir il pass il cumenzament da matg.

Puntraschigna, ils 14 da zercladur 2019

Salis, Weber, Brandenburger, Della Cà, Dürler, Favre Accola, Gort, Hug, Koch, Renkel